

Carta kuu uu n-tunda'a Spalu nuu Timoteo

Ndajan tnu'u Spalu Timoteo

¹ Ru'u, Spalu, kuu-r se n-tunda'a ña'a Cristu Jesús xa ja'an-r nuu ñayiu xa n-ja'an-ia. Daa n-juini Taa-ro Ianyuux. N-ja'an-ia xa kutuu-ro xi'in-ia nikava nikuita xaxe'e xa kunduu-ro xi'in Cristu Jesús. ² Tunda'a-r carta ya'a juan xee nuu-n, Timoteo. Xaxe'e xa n-dakua'a ña'a-r, xijan kuu xa n-kukanu ini-n Cristu Jesús. Kuenda kiu da'ya yi-r kuu ña'a xaxe'e xijan, te xemani ña'a-r. Xijan ta'u-r nuu Taa-ro Ianyuux xi'in nuu Cristu Jesús, Ia kuu Xto'o-ro xa na chindee chituu ña'a-ia xi'in xa na kunda'u ini ña'a-ia. Di'uni xijan ta'u-r nuu-ia xa na ku kunda ku kuvatu anu-n chi n-natu ini-n xa n-kida-n kuechi.

Io xa ja'an Timoteo nuu ñayiu xa n-kida Cristu Jesús

³ Ná n-xo xinokuechi xixitna-ro nuu Ianyuux daa xinokuechi-r nuu-ia, te ña kune ini-r xa xinokuechi-r nuu-ia chi ña tuu nax kida-r. Ntna'a vuelta xko xijan ta'u-r nuu Ianyuux xia'an-r: “Na kuta'u-da, Taa-ro Ianyuux xa n-kida-n xa n-kukanu ini ña'a Timoteo.” Nduu xakuua xijan ta'u-r, ⁴ te naja'an-r xa xko nda'i-n. Hora naja'an-r xa xko nda'i-n, kuu anu-r xa xe kotonini ña'a-r xa na kuvete-r. ⁵ Na'a-r xa xandaa xakuuti kukanu ini-n Cristu Jesús, te ñatu xe tñi ini-r. Kukanu ini-n Jesús ná kukanu ini Loida, ña kuu di'xa'nu-n xi'in Eunice, ña kuu di'i-n Ianyuux.

⁶ Xaxe'e xijan na ja'an-r nuu-n xa kada na'i-n tniu n-ja'an Ianyuux xa kada-n. Koo ini-n koo anu-n kada-n tniu-ia. Na n-xajan ndodo-r nda'a-r diki-n, n-ja'an-ia xa kada-n tniu-ia, te kida-ia xa kida-n tniu xko kida-n. ⁷ Kada tniu-ia chi n-kida-ia xa ñatu kuu-ro ñayiu io. Chindee ña'a-ia xa ñatu yu'u-ro xa ja'an-ro nuu ñayiu xa n-ja'an-ia. Diuni kida-ia xa xemani-ro ñayiu, te ñatu kundee Kui'na xa daja'an ña'a-i xa kada-ro xaloko xadu'a.

⁸ Xijan kuu xa maxku yu'u-n xa kakune'e-n Cristu Jesús, Ia kuu Xto'o-ro nuu ñayiu, ni maxku kujanuu-n xa kakune'e-n-ia nuu-i, ni maxku kujanuu-n xa yindi'u-r xaxe'e-ia. Nda'u ya'a ru'u xaxe'e xa kakune'e-r xa n-ja'an Ianyuux. Nux nda'u ya'a-n ná ya'a-r xaxe'e-ia, maxku kundu ini-n chi kada-ia xa ndaku-n xa kakune'e na'i-n-ia. ⁹ N-dakaku ña'a-ia te n-kaxi ña'a-ia xa ku kuu-ro da'ya-ia. N-kaxi ña'a-ia xaxe'e xa xemani ña'a-ia xi'in xaxe'e xa va'a-ia xi'in xaxe'e xa daa n-juini-ia; ñadu xaxe'e xa kida-ro in xava'a. Ndena ta nkavatu ka ñuñayiu n-ñu ini Ianyuux xa kaxi ña'a-ia. Diuni n-ñu ini-ia xa kuú Jesús, Ia kuu Xto'o-ro xaxe'e-ro. ¹⁰ Xaxe'e xa nda'u ini Ianyuux xi'in xaxe'e xa va'a-ia n-kida-ia xa n-ka xini-ro Cristu Jesús na n-kixi-ia ñuñayiu, te mee-ia kuu Ia n-kida xa ñatu n-te'yu yiki kuñu Jesús na n-yinduxi-ia. Diuni kada-ia xa kiu na nandoto koio roo, ñayiu ka kukanu ini-ia xa kuú-ro, ma kuu ka xa te'yu yiki kuñu-ro chi ma kuú-ro inka vuelta te nikava nikuita kutuu-ro xi'in-ia. Ka xian tnu'u-ro ñayiu nax kada-i xa nanita'u-i xa na kua'a kutuu koio-i xi'in-ia nikava nikuita. ¹¹ N-tunda'a ña'a Ianyuux xa ja'an-r xa'a nuu ñayiu; n-kaxi ña'a-ia xa ku kuu-r se dakua'a-i. ¹² Te xaxe'e

xijan yindi'u-r te nda'u ya'a-r, ko ñatu kujanuu-r xa yindi'u-r xaxe'e xa n-kukanu ini-r xa junuu-ia xa n-taxndee-r-ia. Xini-r jundu kuu-ia te n-kukanu ini-r-ia.

¹³ Dakua'a ñayiu xa n-dakua'a ña'a-r; maxku kakune'e-n ñin xa ña ndaa na kua'a na jini-i xa kukanu ini-n Cristu Jesús xi'in xa xemani-n-yi. Ndaku-n xa dani kukanu ini-n-ia xi'in xa dani juemani-n ñayiu chi kunduu-n xi'in-ia. ¹⁴ Maxku tuku ja'an-n nuu ñayiu hora dakua'a-n-yi. N-ja'an Ianyuux nuu-n xa ja'an-n tnu'u-ia nuu-i. ñin xava'a kuu xijan. Na chindee ña'a Espiritu Ianyuux ñu'u ña'a hora na dakua'a-n-yi.

¹⁵ Xa na'a-n xa ntdaa ñayiu ka kukanu ini Cristu Jesús ñuu xndatuu Asia n-ka dandoo ña'a. ñin-s nani Figelo te ñnka-s nani Hermógenes ¹⁶ Na kunda'u ini Ianyuux Onesíforo xi'in familia-s. Na chindee ña'a-ia chi kue'e vuelta n-taxi-s xa n-ndoñu'u-r, te ña kujanuu-s xa yindi'u-r xaxe'e Cristu Jesús. ¹⁷ Na n-kixi-s Roma n-nanduku ña'a-s xa nde na n-nani'i ña'a-s. ¹⁸ Na kunda'u ini ña'a Ianyuux kiu na ndixi Cristu Jesús. Va'a ka na'a mee-n xa yo n-chindee ña'a-s na n-xo tuu-s Éfeso.

2

¹ Xaxe'e xa chindee chituu ña'a Cristu Jesús, kadayika mee-n xa kada ka-n tniuu-ia. Kuenda kiu da'ya-r kuu ña'a, Timoteo. ² Xa n-ja'an-r nuu-n xi'in nuu kue'e ñayiu n-ka nataka ñin vuelta, xijan juña'a-n nuu se n-dakua'a-n kukanu ini-n xa na dakua'a koio-s ñayiu. ³ Nda'u ya'a-ro nduu-ro, ko kada nde ini. Kada kuenda xa ñin soldado nda'u ya'a kuu-n. ⁴ ñin se kuu soldado, mee ni tniuu

n-xia'an se taxtnuni nuu-s, kida-s; ñatu kida-s tniu se xitu ñu'u a inka tniu. Mee ni tniu n-xia'an se ijan kida-s xa na kua'a na tna ini ña'a-s. ⁵ Diuni ka kuu-ro ná ka kuu se ka dadiki. Juini n-ndaku ñin se n-dadiki, ko ma ni'i-s corona-s nux ña n-dadiki-s xi'in se n-dadiki xi'in-s ná io ná jua'an. ⁶ Diuni ka kuu-ro ná kuu ñin se n-dada'u triu. Mee-s io xa nakueka-s xa n-dada'u-s nuu ñu'u-s, ñadu inka ñayiu. ⁷ Xa'a kuu xa ja'an-r te kani ini va'a nu nax kuu xa ja'an-r. Na taxi Taa-ro Ianyuux, Ia kuu Xto'o-ro xaxtnuni xa kutnuni ini-n ntdaa xa'a.

⁸ Maxku kande ini-n Jesucristu, Ia n-xi'í te n-nandoto-ia. Da'ya dana David kuu-ia. Xa'a kuu xa ja'an-r nuu ñayiu. Tnu'u va'a kuu. ⁹ Xaxe'e xa ja'an-r xa'a nuu ñayiu, kida u'u ña'a dava ka ñayiu te kue'e vida ya'a-r, diko cadena ndijun-r. Ná ndijun se n-xa'ni ndiyi ndijun-r, ko ñatu ndijun tnu'u Ianyuux. ¹⁰ Juini nda'u ya'a-r, ko kunde ini-r xa na nanita'u ñayiu n-kaxi Ianyuux xi'in Cristu Jesús xa ku kuu-i da'ya-ia xi'in xa na kutuu-i andiu nuu io mee ni xa vili xndaa te ya'u nikava nikuita.

¹¹ Nux ka xi'í-ro xaxe'e Cristu Jesús kutuu-ro xi'in-ia.

¹² Nux ka kundee ini-ro hora nda'u ya'a-ro xaxe'e-ia, taxnuni-ro xi'in-ia.

Nux na ja'an-ro xa ña xini-ro-ia, ja'an-ia xa ñatu xini ña'a-ia tuku.

¹³ Juini ma kukanu ini ka-ro-ia ná n-ja'an-ro, ko mee-ia kada na'i-ia xa n-ja'an-ia xa kada-ia, chi Ianyuux kuu-ia, te xaxe'e xa kuu-ia Ianyuux ma kuu xa tuku ku ja'an-ia te tuku ku kada-ia.

Ñin xandaa kuu xa'a.

Ndaku Timoteo xa dakua'a-s ñayiu ka kukanu ini Jesucristu

¹⁴ Nadaja'an-n se ka dakua'a ñayiu ka kukanu ini Cristu Jesús dian xa'a. Jan do'o-n-si, te kunini Ianyuux. Ja'an-n nuu-s xa maxku jantna'a tnu'u-s hora ñatu ka kuu inuu-s chi ña tuu nax kine'e-ro nux daa kida-ro. Xaxe'e tnu'u ka kakune'e-s hora ka jantna'a tnu'u-s nuu xyuku ñayiu daka ni'no-s-yi, te ma jandixa ka-i Cristu Jesús. ¹⁵ Va'a kada tniu Ianyuux na kua'a na ja'an-ia xa kendoo va'a tniu-n, te ma kune ini-n. Ndukundee kada-n tniu-ia. Nux du'a na kada-n, ndaku-n dakua'a-n ñayiu, te mee ni xandaa ja'an-n.

¹⁶ Ñadu xa daa cuentu ña ndandi'i ka ndatnu'u dava ñayiu ku jandixa-n chi ñadu kuenda Ianyuux kuu xijan. Ka dandoo ñayiu ijan Ianyuux xi'in ley-ia vaxi. ¹⁷ Xitendodo cuentu ka ja'an-i jua'an ná xitendodo ndi'yi. Nuu ñayiu ya'a yitna'a Hime-neo xi'in Fileto. ¹⁸ Va'a n-ka xo jandixa nduu se ya'a xa tnu'u Ianyuux kuu in xandaa, ko ñatuka daa ka ja'an-s vitna. Ka ja'an-s xa xá n-ka nandoto ndiyi n-ka xi'í. Du'a kuu xa ka daka ni'no-s dava ñayiu, te ñatuka ka kukanu ini-i Cristu Jesús. ¹⁹ Du'a n-chidotnuni in se n-xo kakune'e Ianyuux: “Xini Ianyuux janda ka kuu ñayiu ndeka-ia.” Diuni yodotnuni: “Na dandoo ntdaa ñayiu ja'an xa kukanu ini-i Jesucristu xaloko ka kida-i.” Ná kuu xa n-xe kodotnuni nuu in yuu nukoo kutu kuu xa n-chidotnuni-s chi ma naa xijan.

²⁰ Na ja'an ntuku-r inka tnu'u ya'a. Ñadu mee ni kidi oro xi'in kidi plata io in ve'e ka'nu se kuika chi diuni neva'a-s ko'o yutnu xi'in kidi ñu'u. Kidi oro xi'in kidi plata tnaa-s xa ya'u xi'in xa ñukax ini,

te ko'o yutnu xi'in kidi ñu'u tnaa-s xa ña xiniñu'u ka. ²¹ Nux ma kada ka-ro kuechi ku kuu-ro ná ka kuu kidi xñu'u xa ñukax ini jan, te kada Ianyuux xa nduu-ro ñayiu ii. Junukuechi-ro nuu-ia, te idii ni vuelta kajan-ro anu-ro xa kada-ro mee ni xava'a. ²² Jun ini-n xa maxku kada-n yika kuechi, vitna kuu-n solteru, chi ñn se kuu solteru, yo kuu anu-s xa kada-s kuechi ñuñayiu. Kadayika mee-n xa kada-n xava'a na ka kida ñayiu n-ka ndundoo n-ka ndunini te ka xijan ta'u-i nuu Ianyuux. Diuni kadayika xa kukanu ini na'i-n xi'in-i Cristu Jesús xi'in xa juemani koio-n ñayiu. Na kutuu vii kutuu va'a koio-n xi'in-i. ²³ Maxku danuu-n cuentu ñatu kuu cuentu ñukax ini ka kakune'e xa n-ka ya'a xix-itna-n ka ndatnu'u dava ñayiu, chi ñatu ndaa xijan. Xa na'a-n xa diko ni ka jantna'a tnu'u ñayiu xaxe'e cuentu ijan. ²⁴ Vivii na ja'an ñn se xinokuechi nuu Ianyuux nuu ñayiu, te maxku jantna'a tnu'u-s xi'in-i. Io xa ku kuu ñn se xinokuechi nuu Ianyuux se va'a kua'a xa dakua'a-s ñayiu. Diuni io xa ku kuu-s ñn se ñatu yachi ini. ²⁵ Na dakua'a-s ñayiu ka ja'an xa ñatu ja'an ndaa-s hora dakua'a-s inka ñayiu chi kudana kada Ianyuux xa natu ini ñayiu ijan xa daa n-ka ja'an-i, te jini koio-i ndeda xa kuu xandaa. ²⁶ Natu ini-i xa n-ka kida-i xa n-juini Kui'na xa kada-i, te ma kundeka ña'a ka-i. Du'a na kada-s na kua'a na kada-i xa juini Ianyuux.

3

Janda ku kuu ñayiu na kuyatni xa naa ñuñayiu

¹ Kuna'a xa yo nda'u ya'a ñayiu tiempo na kuyatni xa naa ñuñayiu. ² Mayo ka ñayiu kachi nda'u nuu tna'a chi mee nga-i jun ini-i. Yo vichi kukajan

ini koio ñayiu jan tvini, te ku ja'an i'ni koio-i, te ku kuu-i ñayiu xe ini. Diuni kui'a ja'an koio-i Ianyuux. Ma jandixa koio-i tadi'i-i. Ni ma ja'an koio-i nuu Ianyuux: “Na kuta'u-da, Taa-ro”, ni ma koo-i xañu'u nuu-ia. ³ Ma juemani koio-i inka ñayiu, ni familia-i ma kunda'u ini-i. Jantna'a koio-i, te ma ndumani koio-i. Tekuechi neñuu koio-i inka ñayiu. Mee ni xaloko kada-i chi ma kundedi ini-i. Ndunde'e koio-i hora na jan do'o ña'a inka ñayiu. Jini u'u koio-i ñayiu kada xava'a. ⁴ Diko koio-i ñayiu n-ka xo kumani xi'in-i. Ma yu'u koio-i xa ka'ni koio-i ndiyi a xa kada-i inka xa kada-i. Xaxe'e xa kutuu va'a koio-i ku kuu koio-i ñayiu xe ini. Va'a ka ku kuu anu-i xa kada-i xa juini koio mee-i dada xa kada-i xa juini Ianyuux. ⁵ Ja'an nga-i xa jandixa-i Ianyuux, ko ña ndaa xa jandixa-i-ia, chi ma naja'an koio-i-ia xa na kua'a na chindee ña'a-ia. Maxku kandeka tna'a-n xi'in ñayiu io vitna ka kida na kada ñayiu ijan. ⁶ Ka kiu ñayiu ya'a ve'e ñá lilu, ñá kue'e xa n-ka kida, xa daja'an ña'a-i xa kada koio ka-ña xaloko xadu'a, te ka xejoon-ña chi ka tna ini-ña xa kada-ña xijan. ⁷ Ndikiu ndiñuu ka dakua'a ñá ya'a in xa ka dakua'a-ña, ko ma uun jini-ña ndeda xa kuu xandaa. ⁸ Ná n-ka kida se n-xo nani Janes xi'in se n-xo nani Jambres xa n-ka ja'an-s nuu ñayiu xa maxku jandixa-i xa n-ja'an Moisés, daa ka kida ñayiu ya'a vitna xa ka dada'an-i xa ja'an-ro nuu ñayiu ka dakua'a-ro ndeda xa kuu xa ndaa. Mee ni xaloko xadu'a xñu'u anu-i. N-xika yata Ianyuux nuu-i xaxe'e xa ñatu jandixa-i-ia. ⁹ Juini ka dada'an-i xa ja'an-ro xijan nuu ñayiu, ko xee xa ma dada'an ka-i chi jini ñayiu xa ñayiu lilu ka kuu-i. Ya'a koio-i na n-ka ya'a nduu

se ña n-ka jandixa Moisés.

Ja'an Spalu nuu Timoteo na tniu io xa kada-s

¹⁰ Xini va'a-n nax dakua'a-r ñayiu, Timoteo. Diuni xini-n janda xko kuu-r, te na'a-n nax n-xo kuu anu-r xa kada-r. Xini-n xa kukanu ini-r Ianyuux. Xini-n xa ñatu yachi ini-r, te xemani-r ñayiu. Diuni xini-n xa kunde ini-r hora nda'u ya'a-r. ¹¹ Koto na n-ka kida u'u ña'a ñayiu ñuu Antioquía, Iconio, Listra du xaxe'e Cristu Jesús. Nda'u n-ya'a-r ijan, ko n-kundee ini-r. ¡Naka kue'e xa n-ka kida ña'a ñayiu! Ko ñatu n-xa'ni ña'a-i chi n-chindee ña'a Ianyuux, Ia kuu Xto'o-ro. ¹² Ntdaa ñayiu ka kida xa juini Ianyuux te ka kunduu-i xi'in Cristu Jesús, yo nde'e nda'u ka ya'a-i. ¹³ Ñayiu loko, kue'e ka xa ka kida-i jua'an. Dani ñayiu ka danda'u inka ñayiu, danda'u ka-i-yi vaxi. Nani kuu xa ka danda'u-i ñayiu, dani danda'u ña'a koio ñayiu. ¹⁴ Kajan anu-n xa jandixa na'i-n xa jandixa-n vaxi. Chinuu na'i xa n-dakua'a-n chi xa na'a-n jundu n-dakua'a ña'a. ¹⁵ Ndena luchin ka'u-n tnu'u Ianyuux xyodotnuni, te kutnuni ini-n nax kuu xa yodotnuni. Tnu'u Ianyuux yodotnuni kachitnu'u ña'a nax kada-n xa nanita'u-n. Xa kada-n xa nanita'u-n kuu xa kukanu ini-n Cristu Jesús. ¹⁶ N-ja'an Ianyuux nax chidotnuni dava se ñuñayiu, te n-ka xo chidotnuni-s. Ntdaa tnu'u Ianyuux xyodotnuni n-ka chidotnuni-s. Va'a xa kakune'e-ro tnu'u Ianyuux n-ka chidotnuni-s nuu ñayiu dakua'a-ro. Diuni va'a xa kakune'e-ro xa'a hora jan do'o-ro-i. Dani va'a xa kakune'e-ro tnu'u-ia nuu ñayiu n-kida in kuechi chi natu ini-i. Xaxe'e xijan ka jandixa-ro-ia, ¹⁷ te diuni xaxe'e

xijan ka kida roo xa ka kuu-ro ñayiu kukanu ini Cristu Jesús xava'a.

4

¹⁻² Ta'u tniu-r nuu-n xa maxku dakuita-n xa ja'an-n nuu ñayiu xa n-ja'an Ianyuux. Nani ja'an-n nuu ñayiu ka juini xa kunini koio-i xa n-ja'an-ia, dani ja'an-n xijan nuu ñayiu ña ka juini xa kunini koio-i xijan. Ja'an-n nuu-i nax kuu kuechi ka kida-i. Jan do'o-n-yi xa maxku kada ka-i kuechi, te diuni ja'an-n nuu-i nax kada koio-i. Vivii dakua'a-n-yi; maxku kukiti ini-n nuu-i. Nini Ianyuux xi'in Cristu Jesús, Ia ndadandaa kuechi ntdaa roo, ñayiu io vitna xi'in kuechi ñayiu xa n-ka xi'í xa xa'a ta'u tniu-r nuu-n. Kixi Cristu Jesús inka vuelta ñuñayiu xa taxnuni-ia. ³ Xa'a ja'an-n nuu ñayiu vitna chi xee kiu kunini koio ñayiu xa kuu ini mee-i, te ma kachi ka-i xa kunini-i xa ja'an-ro. In xandaa kuu xijan. Nanduku koio-i kue'e maestru kakune'e xa ka tna ini mee-i, te kada koio-i xa kuu ini mee-i. ⁴ Ma kachi ka-i xa ja'an-ro nuu-i xa n-ja'an Ianyuux. In xandaa kuu xijan. Kunini koio-i cuentu n-ka xani ini mee xixitna-i.

⁵ Ndo'o, maxku kada-n in xa ñatu natau. Kada nde ini-n hora nda'u ya'a-n. Ja'an nuu ñayiu nax io xa kada-i xa na nanita'u-i, te kada-n ntdaa tniu n-taxi Ianyuux.

⁶ Xa'a ja'an-r nuu-n vitna, te io xa chinuu va'a-n xa ja'an-r chi vax kuyatni xa kuú-r xaxe'e Ianyuux. Doko-r mee-r nuu-ia. ⁷ Nda'u n-xo ya'a-r xa n-kida-r ntdaa tniu n-taxi-ia, ko n-kida na'i-r. Dani kukanu ini-r Cristu Jesús; ñatu n-dandoo-r-ia. Kuenda kiu in se n-xe'en dava, te n-ndaku-s kuu-r xa n-kida-r ntdaa tniu n-taxi-ia, ⁸ te taxi Ia kuu

Xto'o-ro, Ia ndadandaa kuechi-ro, ñn xa taxi-ia na xee kiu chi kida-r xa juini-ia. Kidandaa-ia hora ndadandaa-ia kuechi-ro. Ñadu ru'u ni ni'i xa taxi-ia chi diuni ni'i ntdaa ñayiu ka kuvete xa ndixi-ia.

N-ja'an Spalu xa kada Timoteo xa mani juini-s

⁹ Kundu ini-n ki kotonini ña'a-n. Maxku kukuee-n. ¹⁰ Ndoñu'u ña'a-r chi n-dandoo ña'a Demas xaxe'e xa yo n-kukajan ini-s xa io ñuñayiu, te juan nu'u-s Tesalónica. Se kuu Crescente juan nu'u Galacia, te Tito jua'an Dalmacia. ¹¹ Sluka nga tuu xi'in-r. Kandeka-n Smarku kixi na kua'a na junukuechi-r nduu-r xi'in-s nuu Ianyuux. ¹² Se nani Tíquico, n-natunda'a-r-si juan naxee Éfeso de. ¹³ Kane'e-n capa-r n-dandoo-r Troas ve'e ñn se nani Carpo kixi xi'in ntaka rollo tutu xi'in rollo ññ xyodotnuni tnu'u-r kixi. Mee ni rollo ññ kane'e-n kixi nux ma kuu xa kane'e-n ntdaa rollo jan kixi chi xijan yo ndoñu'u ka-r.

¹⁴ Alejandro, se kuu herrero, n-dada'an-s xa dakua'a-r dava ñayiu. Juña'a Ianyuux ta'u-s chi kue'e xa n-kida ña'a-s. ¹⁵ Koo-n cuedado nuu-s ná io mee-r cuedado chi dada'an-s xa dakua'a-ro ñayiu xa n-ja'an Cristu Jesús. Vichi dada'an-s.

¹⁶ Na n-dada'an ni'no-r mee-r nuu juxtixia xa ki'na nuu, ni ñn ñayo n-chindee ña'a. Ntdaa se xinitna'a xi'in-r n-ka dandoo ña'a. Na taxkanu ini Ianyuux xa daa n-ka kida ña'a-s. ¹⁷ N-ka dandoo ña'a-s, ko ña n-dandoo ña'a Ianyuux Ia kuu Xto'o-ro. N-chindee ña'a-ia xa n-kakune'e-r-ia nuu ñayiu. Ntdaa ñayiu ña ka kuu yatnu'u Israel n-ka tekku xa n-kaku-r nuu nga'a chi n-chindee ña'a Ianyuux. ¹⁸ Mayo ka kada u'u ña'a chi

nakueka ña'a-ia. Kutuu-r nuu taxnuni-ia. Juan kiu juan ñuu io xa ndadaka'nu-ro-ia. Nuncas ma jin ndi'i xa nduka'nu-ia. Amén.

Ndajan tnu'u Spalu ñayiu ka kukanu ini Cristu Jesús xndaxio nuu tuu Timoteo

¹⁹ Ndajan tnu'u-r Priscila xi'in Áquila xi'in familia Onesíforo. ²⁰ Erasto, tuu-s Corinto. Trófimo, ku'u-s. N-dandoo-r-si Mileto. ²¹ Kundu ini-n kixi-n na kua'a xa kutuu-n ya'a dadaa xee-ro yoo vixi. Ndajan tnu'u ña'a Eubulo xi'in Pudente. Diuni ndajan tnu'u ña'a Lino xi'in Claudia xi'in ntdaa ka se ka kukanu ini Cristu Jesús. ²² Na kunduu-n xi'in Ianyuux, Ia kuu Xto'o-ro. Na chindee chituu ña'a-ia, Timoteo.

Tnu'u va'a tnu'u Jesucristo
New Testament in Mixtec, Diuxi-tilantongo
(MX:xtd:Mixtec, Diuxi-tilantongo)

copyright © 2001 Wycliffe Bible Translators, Inc.

Language: Mixtec, Diuxi-tilantongo

Translation by: Wycliffe Bible Translators, Inc.

Mixteco, Diuxi y Tilantongo [xtd], Mexico

Copyright Information

© 2001, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Diuxi-tilantongo

© 2001, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

601f9a87-70f6-56f7-8175-fc2dac9c9f9a